

minus crassæ. Thorax capite vix latior, ovatus. Petiolus ut in ♀. Alæ dilute fuscescentes, costis et stigmate fusco-cinereis, costarum dispositione ut in genere *Plagiolepis*. — L. $2\frac{1}{3}$ mm.

Mas. Color ut in ♀. Caput transverse quadratum, angulis magis rotundatis quam in ♀. Clypeus et mandibulæ ut in ♂ et ♀. Antennæ 11 articulatæ, scapo ocellos attingente, funiculo filiformi, articulo ultimo magno et crassiore. Thorax latus; petioli squama fere ut in ♀; alæ ut in ♀. Genitalium stipes longus et subtilis. — L. $1\frac{1}{4}$ mm.

Friedrich-Wilhelmshafen. Specimina singulatim capta; inter ea una ♀ et unus ♂ quos eidem speciei tribuendos putavi.

Subgenus *Rhizomyrma* a FOREL pro speciebus ex America meridionali institutum, nec hucusque ex aliis regionibus notum erat.

88. *Polyrhachis chartifex* n. sp.

Operaria. Obscure fusca, tarsis, tibiis et trochanteribus rufescensibus, mandibulis rufis, funiculi dimidio apicali croceo; vix pubescens, pilis nisi in clypeo et gastere destituta; thoracis dorso subopaco, cæterum nitida. Caput ovatum, latitudine maxima parum longius, confertim punctatum, mandibulis 5 dentatis, nitidis, clypeo obtuse carinato, antice arcuato, laminationis frontalibus distantibus, sigmoideis, antennis gracilibus, scapo opaco, funicolo setulis brevibus erectis hirsuto.* Thorax gracilis, dorso depresso, lateribus acutis, rugoso-punctatus, pronoto leviter convexo, medio impressione longitudinali signato, angulis humeralibus obtusissimis, mesonoto antice rotundato, postice angustato, parte anteriore subplana, posteriore concava, impressione arcuata has partes separante, epinoti parte basali plana, lateribus subparallelis, paulo longiore quam latiore, postice utrinque dente erecto, acuto. Petiolus squama crassa, rotundato-cubica, utrinque spina brevi, subtili, acuta. Gaster lucida, subtilissime transversim rugulosa. L. 4—5 mm.

Foemina. Sculptura profundiore et confertiore minus nitida, mesonoti scuto longitrussum striato, opaco, epinoti dentibus apice obtusis, spinis squamæ crassioribus, inter spinas angulo impari obtuso ab operaria differt. L. 7 mm.

P. gracili EMERY proxime affinis, sed capite minus elongato, mesonotique lateribus haud angulatim elevatis distinguenda.

Tamara Insula prope Berlinhasen. Nidus chartaceus sub foliis *Caryotae urentis*.

89. *Polyrhachis Andromache* Rog.** var. *semitestacea* n. var.

Operaria. Capite, thorace et squama fusco-nigris, scapi apice, pedibus

* Setulas erectas similes funiculi in *P. Frauenfeldi* MAYR, *Ourinax* Rog., *unicuspis*, *Wallacei*, *gracilis*, *Solmsi*, *lombokensis* et *Fruhstorferi* EMERY observavi.

** Propter synonymiam conf. EMERY in Ann. Mus. Civ. Genova, v. 38, p. 579. 1897.